

Программаличи баянти.

Миллатла мезлис «нешла мез» ирули бирар. Нешла мезличил сай дурх1я бег1 гьалав гъайик1ес вех1ирхъуси; илдачил сари вишт1аси дурх1яла бек1лизир алк1ути цаибти пикруми; илдала кумекличил саби г1ямрула халаси гъунилис бех1бихъуд кабирхъуси.

«Нешла мез» вег1ла миллатла бег1лара къадричебси лишаннизи халдирути сари. Гъарил адамла миллат белгибирнила бек1либиубси лишанра миллатла мез ункъли далнилизиб саби.

Сунела миллатла мез ункъли далнигъарил адамла рух1ласи культурала чараагарси чебла саби. Бег1тала бек1либиубси чеблализи халбируси саби чула дурх1нази нешла мез дагъахъни. Школала ва учительтала бек1лидиубти мурадуназибадра ца саби нешла мез далахънила мяг1ничебси х1янчи даимбарни. Илбагъандан саби школализиб нешла мез руркъяхъниличи халаси пикри бях1чиуусира.

Дарган мез даргала халкъла мез сари, чулара Дагъиста ва Кавказла г1ях1цад царх1илти мераначирл тухумдеш лерти.

Дарганти саби-ургаб гъайбик1ух1ели, радиолизир, театрлизир, газетаби-журналтазир, жузазир, г1ядатли биубли, дузахъу даргала литературный мез. Илди, цабех1ла цабех1ли пикруми иргъесли, ирнила ва лук1нила белгити низам-къяйдаличи далдикибти сари. Хъулчилизи ахъушала лугъат касили, царх1илти лугъатунала цацадех1 дугъбачил давлачердиахъубти литературный мезличил саби школализиб даргала уршби-рурсби белк1-беч1личи бурсибирути.

Ишди программабала мурадра школабала 5-11 ибти классуназир даргала литературный мездуч1ахънила шайчирти т1алабуни белгидарни ва илди мезличил дурх1ни азадли гъайбик1ахъес бурсибарни саби.

Ашкарличи мешули, дарган мезла х1екълизирти г1ях1цад багъудлуми буч1атани бех1бихъудла классуназир кайсути сари. Чедирти (5-11) классуназир кайсути багъудлуми гьалар касибтачи челушути сари, гьат1ира дяг1удик1ахъули сари, т1инт1дик1ахъули ва мурхъдик1ахъули

Дарган мезла лерилра-сера дурсрачир учительла пикрила дайлар диэс г1яг1нити сари х1ябал бях1чибиз, чулара чулара ахирласи мурад ца саби.